

重刻漢中府志

重刻
漢中

府志

民國甲子
秋墨刻于
西陲省城

重刻漢中府志序

有清淑浦嚴樂園廉訪著陝西漢中府志攷訂詳明
敘述典核時當川湖陝教匪剿平後於南山險要開
屯置戍多所考稽誠邦志之最良者也余夙聞是書
名徒以從事兵間卒卒鮮蒐訪之暇迫奉

中樞命省方關輔輒因軍事訪知山南東西兩道山
谷阻深江河環繞士習詩書之業民敦禮讓之風物
產豐饒土田肥美地連秦雍水下荆揚證諸今文韓
詩家所云遵彼漢皋卽遠指此漢水班孟堅氏爲習

今文齊詩者亦謂漢中郡南鄭縣有旱山爲沱水所
出東北入漢以釋詩大雅瞻彼旱麓之旱山伊古以
來山南一隅神臯奧區久稱天府遠援經義近察方
輿屏蔽東南實爲重鎮將以探兵要究治方舍紀載
其曷資焉緣是急覓此編久之始晤南鄭藍君葆初
沔縣侯君劍澄城固王君筱康以舊刻本見示具述
此志板片燬於兵火郡中耆賢思欲重刊而力未逮
也兼江寧吳敬之固始萬鈍安亦力言文獻攸關慙
愚爲之余遂囑所司籌撥銀幣二千並函 吳芑孫

幫辦互爲攷助計刊需不逾三千元而此書遂以重新剞劂永廣流傳上之可供

國史氏之徵求下之可助地方官之考索中則存職方故實備輶軒咨詢經學以爲蓄畚兵家以爲韜畧卽彼時山南一道整軍經武禁暴戢兵之故蹟具可按籍而稽語云前事不忘後事之師或者於樂園廉訪纂輯郡志之本意不無小補也夫是書重刻之議創自藍侯王諸君總司校勘者則南鄭林君捷三梓成當在明春特先敘其原起於此時甲子八月十六

日也陝西省長兼署督軍鞏縣劉鎮華謹序

重刻漢中府志序

余忝總師干在兵間二十餘年馳驅戎馬足跡半天
下所至以攻守形勢每索邑志縱觀攷厯代用兵之
迹証之軍中所繪輿圖開益神智時獲我心因歎古
人著書立說非第爲觀美也民國十年自德安移師
關中旋奉陝南邊防之命爰張兵兩翼一由武關趨
興安一由寶鷄規南鄭中間搏戰匝月漢南全境乃
定越明年復奉命幫辦陝西軍務乃卽南鄭前漢中
道公廨爲行署顧念斯邑久罹兵革時以休養爲務

暇與是邦人士相接僉以志乘未修有意斯事同里
阮君翱北時權南鄭縣篆亟成邑志余爲序而行之
而漢中府志則自前清嘉慶癸酉激浦嚴樂園先生
守漢中時重修後中經亂事垂百餘年板燬於火無
繼其後者攷漢中自秦通蜀道高帝肇基王業山川
靈秀人材代興設官斯土視爲重鎮今府治雖已不
存而版圖未易況樂園先生澤浹漢南祠於名宦其
修訂府志不愧名作然則收拾遺墜表彰前哲其責
烏可緩耶南鄭藍君葆初沔縣侯君劍澄城固王君

曉康怒焉傷之謀於同人搜得嚴志舊本思重刊而
補葺之請於督軍劉公雪亞抵書於余及漢中道尹
各捐貲以助開雕之費閱一年而嚴志重完不可謂
非盛事也夫值國家多故百端更始諸君子維桑與
梓拳拳於典章文物使前賢已燼之籍復得公諸同
好魏文帝曰斯文未墜必有英絕出而領袖之者諸
君子有益於人心世道誠知所先務矣况劉公雪亞
禮聘名賢方開陝西通志之局取斯志上之秉筆者
採擷菁英異日書成海內通儒碩士皆將爭先快覩

余不敏聊識顛末於簡端以志欽挹云爾

民國十四年孟春合肥吳新田撰

重刻漢中府志序

辛酉冬貞豫再權南鄭篆時續修新志成既讀而序之矣越二年復拜分巡陝南之命藍紳葆初侯紳劍澄王紳曉康以郡志重梓告竣問序於余余維漢中漢高所封地山川人物夙著雄稱且道通隴蜀要扼荆襄國家設立鎮道倚爲屏蔽大勢所關匪特陝西一隅之輕重官斯土者留心稽古輒思得所據依以資治理然則郡志之關係顧不重哉矧斯志爲名賢所編紀載精閎考據詳密向惟康次衡先生家有藏

本每一披覽覺漢水梁州之政俗咸釐然而可稽獨
惜同治髮亂板燬無存遂使乾嘉以前掌故概付劫
灰去夏陝省通志開局纂修檄縣令採事蹟以聞各
縣士紳提倡修志風動一時亟待此書藉資參考徧
爲蒐訪迄不可得率抱數典忘祖之嗟顧念民國廢
府續修之役當然停止憲法留縣裁道是議修道志
亦貽笑覆瓿耳推此以論斯志不啻嚴公之絕筆在
今日實有重刻之必要繼自今漢中各屬之文獻旣
絕而復續藍侯王三紳可不謂知所重歟是役也開

始於夏五月歷秋冬而工竣先是王道尹壽乾倡捐
洋六百圓余復捐七百圓以助之其校勘而始終其
事者則林君捷三也時民國甲子嘉平旣望漢中道
道尹合肥阮貞豫謹撰

漢中府舊志序

郡國亘古不變者在天爲分野在地爲山川
若戶口則登耗變矣賦役則輕重變矣兵防
則疎畧變矣官師人物則盛衰變矣溝壘渠
梁膠庠廨宇以及諸所建置則隆替變矣郡
必有志所以紀變也備攷而謹書之使良庖
司割者知大窾堅軟所在砉然遊刃診脉而
誌其浮沉虛實據案處方補泄可以無誤志

之利益如是予抵興元首問主藏吏漫應曰
無有索之再三以鐫版數片呈積塵寸計點
畫不可辨蓋自萬歷癸卯以至於今垂及六
十年所不付諸羸燼者幸也前輒旣仄來軫
方彙而絕續之間閭無紀述用怍然不釋於
懷會天憫予遺雨暘時若守土吏旣獲有寧
宇仰稟

各憲臺教令朝夕佩成算故雖以謏劣下才

如達道者得勉竭馬牛奔走之力冗中抽暇
謀成此書書成撫卷喟歎歎世事之變相尋
未有已也薙草卜居流庸漸復由耗而變之
登也汰無莠之征用緩有節由重而變之輕
也蒙戎藜藿之中虎豹憑焉由疎而變之密
也旦氣初動知寵賂之可羞公道重昭以弓
旌爲不辱由衰而變之盛也彼黍離離百工
斂跡矣斧斤復應乎星辰畚插乍興其雲雨